

NA EETANA KEKEDELAA A PAUL FUANA A TIMOTHY

¹ I nau a Paul, na aposol nia a Christ Jesus. I nau naa ta aposol sulia na eeresia a God na faamouri gia fai nia a Christ Jesus na wane gia kwaimaasimaasia. ² I nau naa ku kekede fuamu a Timothy. I oe naa iilingia na wela nau sulia oe o manata mamana ana baelagu sulia a Christ. Nau ku fooma eeri a God na Maa fai nia a Christ Jesus a Lord gia ka falea na dianalaa ma na kwaimanataia ma na fanualama fuamu.

³ Nau ku doori oko too ua amu i Efesus iilingia baa nau ku aare oe ana lealagu uria i Masedonia. Sulia teni tooa i seenae gera faatolomainia na faatolomailaa susuge, ma nau ku dooria oko bae luida. ⁴ Oko haea gera ka lugasia na uunuunua haungailana gi ma na talisibaralaa tekwa gi sulia koo gera gi. Sulia na doo nae gi na haitamana ka haungainia na oolisuusulaa gi, ma langi kasi lea sulia na kwaidoorilaa a God. Sulia lea gia fiimamana ana a God, gia ka bobola uria haitamanalaa na kwaidoorilaa nia. ⁵ O eeresi gera urinae eeri na rakedianalaa gera ka baita ma ka lea mai faasia na mouria na e folaa ma faasia na manataa na e gwaligwali folaa ma faasia na fiimamanalaa na e mamana. ⁶ Sulia teni tooa gi da aabulo e'ete na ada faasia si doo naa gi, ma daka lea na ada sulia na oolisuusooewanealaa. ⁷ Gera dooria hai so daka hau ana na wane faatolomai gi ana na kwaieresia nia God gi. Haia, ma langi dasi haitamana go na baelaa

gera gi i talada ma langi na doo gi na da bae rigita sulia.

⁸ Haia, golu haitamana na kwaieresia gi nia na doo e diana, lea so na wane faatolomai gi da o'olo sulia. ⁹ Ma golu ka haitamana laugo a God langi si haungainia na kwaieresia gi fuana tooa diana gi. Nia e haungainia ana fuagera na tooa gi na langi dasi roosulia na kwaieresia gi, ma na tooa na aadelada e ta'a gi, ma na tooa gi na e langi dasi manata baita ana a God, ma na tooa gi na da fualangaa, ma na tooa gi na dasi foosia a God. Ma nia ka haungainia ana fuana tooa gi na da hauwane, ma na tooa gi na da haungia na maa gera gi ma ni tee gera gi, ¹⁰ ma na tooa ooeoe gi ma na wane gi na da aadea wane gi, ma na geni gi na da aadea geni gi, ma na tooa na da lau wane aagwa, ma na tooa susuge gi, ma na tooa gi na da iilia tesi doo na e e'ete faasia na faatolomaia mamana. ¹¹ Ma na faatolomaia nae e lea sulia na Faarongolaa Diana na a God e aalua i abagu hai kuka ainitalo ana. Na Faarongolaa Diana nae, nia e ita mai faasia a God na e initoo liu ma ka diana asianaa.

A Christ Jesus e dao hai so ka faamouria na tooa ta'a gi.

¹² Nau ku baelafea a Christ Jesus na Lord gia, na wane na e falea na rigitaa fuagu uria na iililana na raoa nau. Ma nau ku baelafea laugo suli nia e manata ngado ani nau ma ka aadafili nau uria na raolaa fuana. Sui nia e aadafili nau, ¹³ boro ana si kada baa i nao doo ku iinokesia ma kuka bae ta'a sulia, ma ku bae tataga ana. Ma a God e kwaimanatai fuagu, sulia i nau langi kusi

fimamana ua ma kusi haitamana na doo nae ku iilia. ¹⁴ Ma a Lord gia e faadiana ani nau ka baita asianaa, ma ka adomi nau eeri kuka fimamana ani nia ma kuka rakediana laugo ani nia. Nia e haitamana iililaa urinae fuaga na tooa na da ngado ana a Christ Jesus.

¹⁵ Haia, si asi baelaa naa e mamana ma gia ka manata mamana ana baa e urii, <<A Christ Jesus e lea mai lao molaagali eeri ka faamouria tooa na da aadea ta'a.>> Haia, ma ni nau ku fualangaa ka liufi gera sui. ¹⁶ Sui a God ka kwaimanatai fuagu, eeri a Christ Jesus ka faatania na gwaromaabelaa nia gi sui fuagu nau wane ku fualangaa asianaa, eeri ku iilingia na mamalafooa fuana ni tei gera na tara daka manata mamana ani nia ma daka ngalia na mouria firi. ¹⁷ Haia, a God naa na Aaofia ka too firi, ma langi kasi mae, ma langi gia kasi rikia, ma taifili nia laugo a God, nau ku dooria gia ka baelafea ma gia ka faabaita ana ka too firi. Amen!

¹⁸ Ma ni oe a Timothy wela nau, i nau ku bae fuamu iilingia si baelaa baa gi na profet gi da haea suli oe ana si kada e sui na mai. O taingainia na baelaa baa gi iilingia na raunga oe gi eeri oko firu diana fai nia a Satan. ¹⁹ Ma oko dau ngado ana fimamanalaa oe ma oko iilia na doo gi na o haitamana nia o'olo. Teni iimola gi da eekwatainia naa na doo gi na gera haitamana nia o'olo, ma daka labasia na fimamanalaa gera. ²⁰ Ma teni wane ada na a Haemeneas ma a Aleksanda, daaro too laugo i matangada na tooa nae gi, ma ku lugasida naa fuana a Satan hai ka

iilia ta doo fuadaaro, eeri daaro ka langi si bae tataga lau sulia a God.

Na ooguogua fai nia na fooalaa gera tooa da manata mamana gi.

2

¹ Na doo totongenao nau ku iingo gamu eeri muka fooma fuana a God, ma muka baelafe nia, ma muka gani nia uria adomilana tooa gi sui, ² ma na aafia gi ma ni tei gera gi na da too ana na initooa, eeri gia sui gia ka too ana mouria ana aaroaroa ma na fanualama ma manata baitalaa ana a God fai nia na aadea o'ololaa gi. ³ Si doo naa na e diana ma ka faaelea a God a Faamouri gia. ⁴ Sulia a God e dooria na tooa gi sui daka too ana mouria firi ma daka haitamana na mamanalaa. ⁵ Sulia tee God go, ma tee wane go na e oolifainia na tooa gi fuana a God. Nia na Christ Jesus. ⁶ Sulia a Jesus e falea na mourilana i talana eeri ka lafua na tooa gi sui faasia na kwakwaelaa. Urinae a God, ana si kada na nia e filia, nia ka faatainia na kwaidooria fuana tooa gi sui daka too ana mouria firi. ⁷ Nia naa, a God ka fili nau eeri kuka aposol ma na wane faatolomai gera na tooa na langi gera kasi Jiu gi ma kuka ainitalo ana na faarongolaa mamana ana na manata mamanalaa ana a Christ. Nau langi kusi suge. Doo mamana nau ku haea.

⁸ I nau ku dooria na wane gi ana gula gi sui gera ka fooma. Na wane nae gi, gera ka falea na mourilada fuana a God, eeri si kada gera fooma ana, gera ka bobola uria uualana na abada aabu

fui langi. Ma na wane nae gi, langi daka si haitamana rakehasua ma na oolisuusulaa.

⁹ I nau ku dooria laugo na geni gi langi dasi faabaita gera ana oofilada, ma gera ka oofi o'olo ana maku gera gi, ma langi lau fai nia na kani iifulaa uria faabaitalaa, ma langi ana na doo gi na e liu baita na da laungi ana, ma langi ana na maku gi na e liu baita. ¹⁰ Haia, na aadelaa diana gi na e bobola fuana geni gi na gera haea gera manata mamana. ¹¹ Na geni gi daka too aaroaro ma daka faato'ou si kada daka fafurongo ana faatolomaia. ¹² Nau kusi faalamainia na geni gi hai gera ka faatolomai ma daka baita faafia na wane gi. Nia e bobola fuana gera ka too aaroaro go ada. ¹³ Sulia a Adam naa a God e haungainia i nao, suifetei ni Eve. ¹⁴ Haia, ma a Adam langi baa a Satan e sugea, ni Eve ana baa ka manata mamana ana na sugea a Satan ma ka oia kwaieresia a God. ¹⁵ Haia, lea so na geni gi daka fiimamana ka ngado, ma daka rakediana, ma daka too o'olo, ma daka faato'ou, i gera daka mouri go ada ana na faafutalaa.

Na wane naonao gi la soefaataia.

3

¹ Si asi baelaa baa urii nia mamana, <<Lea ta wane e dooria ka naonao laona soefaataia, tama wane nae e dooria na raolaa diana asianaa nae.>> ² Haia, na wane naonao la soefaataia na wane nae na aabulolana ka o'olo asianaa, ma i nia ka too ana tee afe go, ma i nia ka aadasuli diana ani nia i talana, ma ka manata

o'olo, ma ka iilia doo diana gi. Ma nia ka gonitainia tooa gi i luma nia, ma ka bobola uria faatolomaidoolaa. ³ Nia ka langi si gwou baita ana na doo rigita ma ka langi si dooria firulaa. I nia ka too noni hahaore fai nia fanualamalaa, ma nia ka langi si lulugoni ana malefo. ⁴ Ma nia ka haitamana olosia wela nia gi ma na afe nia ma ka faatolomainia na wela nia gi eeri gera ka roosuli nia ma daka manata baita ana. ⁵ Sulia lea na wane langi kasi haitamana na aadasulilana na wela nia gi ma na afe nia, tara nia ka aadasuli utaa ana soefaataia a God? ⁶ Na wane na manata mamana ka tau, aata i nia ka too nanaka iilingia a Satan, ma a God tara ka keto nia laugo. ⁷ I nia laugo na wane fuana tooa i maa ana soefaataia gera ka manata baita ana, eeri ka langi kasi ida ana tesi doo ma laugo ka langi asi nia i laona na tori nia a Satan.

Na wane ni kwai'adomi gi la soefaataia.

⁸ Na wane ni kwai'adomilaa gi la soefaataia laugo, na aabulolada ka diana ma daka bae mamana. Ma langi dasi gwou baita ana gwoulaa bubulo gi ma langi dasi aanau ana malefo. ⁹ Gera ka manata mamana ngado ana faatolomailaa mamana fai nia na manata folaalaa sulia. ¹⁰ Ma na tooa na da manata mamana gi daka iilitooda fasi i nao, eeri gera haitamana daka o'olo naa suifetei kafi rao naa. ¹¹ Ma na afe gera gi laugo, na aabulolada ka diana, langi dasi uunuunu buri, ma daka aadasuli diana ani gera i talada, ma daka o'oloa ana si doo gi sui. ¹² Ma na wane kwai'adomi la soefaataia, nia ka too ana tee afe go, ma ka haitamana olosia na afe nia ma

na wela nia gi. ¹³ Ma ni tei gera na da rao diana la soefaataia, tara ka diana fuada, ma tara ka bobola fuada gera ka bae rara'a sulia na fimamanalaa gera ana Jesus Christ.

Si doo baita na e aagwa.

¹⁴ Ana si kada na nau ku kede kou fuamu ana naa, i nau ku manata hasa tara ku lea ma kuka riki oe ali'ali. ¹⁵ Ma lea ku tau kou, na kekedelaa naa na tara ka faatainia fuamu na aabulolaa utaa na tara golu ka iilia la oofuofua nia God, na soefaataia na a God momouria. Ma a God e aalua naa na faatolomaia mamana fuana na soefaataia iilingia ta wane e tolea na luma nia i fafona na fungu gi. ¹⁶ Langi ta wane hasa ka bobola uria tofelana baitalana na doo aagwa ana na faatolomaia sulia a God na golu lea sulia. Na faatolomaia ka urii, <<A Christ e hau ana wane, ma na Aanoedoo Aabu ka faatainia naa na o'ololana, ma na ensel gi daka riki nia naa. Gia ka faatalo naa ani nia fuana toa kwalukaela, ma na toa gi lao fera oro daka manata mamana naa ani nia, ma a God ka ngali nia naa uria i langi.>>

Na wane faatolomai susuge gi.

4

¹ Na Aanoedoo Aabu e bae folaa ana hasa teni wane gi tara gera ka lugasia na manata mamananalaa gera ana tesa kada i'isi gi, ma daka roosulia na aanoedoo susuge gi ma na faatolomaia gera na aagalo ta'a gi. ² Na faatolomaia nae gi da ita mai faasia na wane susuge gi na langi dasi liobukonu sulia na aade ta'alaalaa gera gi.

Tooa e'ete, lea daka aade ta'a, daka liobukonu. Sui taa, na tooa susuge nae, langi dasi liobukonu sulia na manatalada e ta'a teefou naa. ³ Na tooa nae gi da faatolomai hasa na aarailaa ma na toowanelaa e garo fai nia anilana teni si fanga gi. Haia, ma God na e haungainia na fanga nae gi uria na anilana, i buira tei gera na da manata mamana ma daka haitamana na mamanaa da falea si foalaa ni baelafea fuana a God. ⁴ Sulia na doo gi sui na a God e haungainia, langi tesi doo kasi ta'a, da diana sui go. Haia, lea so gia ka fooma ni baelafelaa fuana uria, e langi gia si oote gia na ana ta si doo. ⁵ Sulia na baelana a God ma na foalaa uria na doo nae, nia na aadea a God e aalafaafia.

Na wane ni rao diana nia a Christ Jesus.

⁶ Lea so o falea si faatolomailaa naa gi fuana ni tei gera na da manata mamana gi, oe na wane rao diana nia a Christ Jesus, ana si kada o mouri ana na baelaa gi ana na manata mamanaalaa ma na faatolomaia mamana na o lea sulia. ⁷ Haia, langi osi fafurongo sulia na uunuunua haungailana ta'a gi na a God e langi kasi dooria. Oko hasi amu taari uria na faarigitalana na manata mamanaalaa oe, eeri oko bobola uria iilia na kwaidooria a God. ⁸ E diana fuana na wane ka faarigitaa na noina. Haia, ma e diana tasa lea na wane ka faarigitaa na manata mamanaalaa nia, sulia nia e aalua na mouria uria si kada naa ma si kada aai loko na tara ka dao mai. ⁹ Na asi baelaa naa nia e mamana, ma golu ka manata mamana ana. ¹⁰ Golu ka hasi rigita ma golu ka rao rigita, sulia golu aalua fiitoolaa golu ana God momouri. Sulia nia a doo faamouria na tooa gi sui ma e

tasa fuana tei gera na da manata mamana aninia.

¹¹ Lea doo oko eeresia ma oko toolamainia na tooa ana doo nae gi. ¹² Ma langi osi faalamainia na tooa gi gera ka haea i oe osi wane kwaitalai sulia oe na wane daraa. I oe oko iilingia ta mamalafaoa diana fuana na tooa na gera manata mamana gi, i laona na baelamu ma na aabulolamu ma na rakedianalamu ma na fiimamanalamu ma na too folaalamu. Sulia lea gera rikia na aadelamu e diana, gera ka iili laugo urinae. ¹³ Suifetei kufi dao mai, oko iidumia na Kekedelaa Aabu gi fuana tooa gi ma na ainalolaa ana Faarongolaa Diana ma faatolomailaa. ¹⁴ Ma langi osi lugasia ana na falelaa oe na Aanoedoo Aabu e falea fuamu ana kada na profet gi da bae ana ma na wane naonao gi i laona soefaataia da aalua na abada i fafomu. ¹⁵ Oko iilia si doo nae gi sulia dani eeri na tooa gi sui daka rikia na dianalana raa oe ka baita naa. ¹⁶ Oko aada diana sulia na aabulolaa oe i talamu ma na faatolomailamu. Ma oko tasa dongaa fainia si raa nae gi, sulia lea o iilia, haitamana oko faamouri oe i talamu fainia ni tei gera na da rongoa baelamu.

5

¹ Langi osi ngatafia ta wane waro, ma e bobola o bae fainia iilingia ta maa amu. Ma lea o iilia si doo fuana wane daraa gi ka iilingia o iilia fuana haasimu gi. ² Ma lea o iilia si doo fuana inite aagi ka iilingia o iilia fuana tee oe gi, ma lea o iilia

si doo fuana aai haari gi ka iilingia o iilia fuana waiwane oe gi i laona manatalaa diana teefou.

³ Ma o manata baita ana gwe oru gi na da too taifili gera. ⁴ Haia, ma lea gwe oru na e too ana na wela gi ma langi na kokoo gi, gera bobola daka iilia maluta diana totongenao fuana ka iilingia na tee gera ma na koo gera ka iilia fasi fuada, sulia si doo nae na God e eele sulia. ⁵ Ma gwe oru na e too taifili nia ma ka langi ta wane uria aadasulilana, nia ka aalua na fiitoolaa nia ana God, ma nia ka tasa dongaa ana foomalaa nia ma ganilana uria kwai'adomilaa nia rodo ma na dani. ⁶ Haia, ma gwe oru aai na e hasi uria na kwaidooria ana noni, sui boroi ana nia ka mouri ua, nia iilingia e mae sui naa. ⁷ O falea na faatolomailaa naa gi fuada, eeri ta wane ka langi si daotoona ta garoa ani gera. ⁸ Ma lea ta iimola kasi aadasulia na tooa futa nia gi ma tasa na iimola ana aebara nia, tama iimola nae e lugasia na faatolomailaa na nia e haea ka fiimamana ana, ma nia e ta'a ka liufia na tooa na langi dasi manata mamana.

⁹ Ma na gwe oru na langi kasi dao ua ana oono aakwala fe ngali, langi osi iidu oofu nia fai nia na oru gi. Oko iidua ta gwe oro lea nia e waro, ma laugo nia ana lefe afelaa. ¹⁰ ma gera haitamana hasa nia ka iili raolaa diana gi urii: Nia ka aada diana naa sulia na wela nia gi, ma ka gonitainia naa na tooa dao gi i luma nia, ma ka faato'ou nia, ma ka adomia na tooa gi i laona soefaataia ma tei gera na da too ana na afetaia, ma ka lugasi teefou ani nia uria na iililana raoa diana gi.

¹¹ Ma na aai oru gi aai na langi dasi inite

ua go ada, ka langi osi iidu oofuda fai nia na oru gi. Sulia lea gera dooria na afelaa lau sulia na kwaidoorilana nonida, gera haitamana daka aabulo e'ete na ada faasia na raolaa fuana a Christ. ¹² Ma lea gera urinae, gera ka aadea ta'alaasulia gera oia na bae aalualua na da iilia totongenao fuana a Christ. ¹³ Ma gera haitamana labasilana na kada gera gi uria liu kwailiulaa i luma gi. Ma si doo na e ta'a ka tasa na da uunuunu go ada ma daka bae sulia si doo gi na langi si bobola uria baelaa sulia. ¹⁴ Nia naa, nau ku manata hasa e diana fuana oru haari gi daka afe lau ada ma daka faafuta wela ada ma daka aadasulida fai nia na luma gera gi, eeri na maalimaea gia gi ka langi tesi doo uria na bae ta'alaasulia ana suli gia. ¹⁵ Sulia teni oru gi da aabulo e'ete na ada, ma daka lea na ada sulia a Satan. ¹⁶ Ma lea so ta geni na e manata mamana ana Christ ma ta aai oru ka nii lao aebara nia, nia ka aadasulia. Sulia ka langi si diana fuana faa'aberosia lau na tooa gi na da manata mamana, eeri gera ka aadasulia na ada na oru gi na gera too taifilida teefou.

¹⁷ Ma na wane naonao gi na gera rao diana i lao soefaataia, nia bobola uria ngalilana na kwaiaraa baita. Tasa asiana fuana tei gera na da rao rigita ana ainitalolaa ana Faarongolaa Diana fai nia faatolomailaa. ¹⁸ Sulia na Kekedelaa Aabu e bae urii, <<Langi osi kani faafia na fakana na bulumakau ni rao si kada e uuri magaa ana mige doo gi.>> Ma ka bae laugo urii, <<Na wane ni rao haitamana ka ngalia na folilaa nia.>>

¹⁹ Haia, ka langi osi fafurongo uria baelaa ta

wane go ana na e feengia ta wane naonao, lelea ta roo wane ma langi ta oolu wane lea mai daka faamamanaa doo naa taari. ²⁰ Haia, oko ngatafia na tooa gi na da aade ta'a. Oko iilia si doo nae i maada na tooa gi sui, eeri na tooa gi na da too i seenae gera rongo, ma daka mou.

²¹ I nau ku eeresi oe i maana a God ma a Christ Jesus ma na ensel aabu gi, hai oko roosulia na faatolomailaa naa gi, ma langi osi eefa ma langi filia ta wane sulia na taa na o rikia i maa. ²² Ma langi osi oongaongoa ana aalu abalaa fafona ta wane hai nia ka aabu uria raolaa fuana Lord. Ma langi osi ado fai nia tooa si kada gera aade ta'a. Oko faaabu oe i talamu!

²³ Lea doo oko gwoufia si gale waen fai nia na kafo haia ka adomia na rakemu ka diana, sulia ni oe na wane o matai tarau.

²⁴ Na aade ta'alaa gera teni tooa gi e waluda asianaa naa uria na rikilana ma ka talai gera uria na keketoa. Haia, ma na aade ta'alaa gera teni tooa aai, da rikia boro buri naa. ²⁵ Haia, ka urinae laugo, na aadelaa diana gi e too faatai asianaa uria rikilana. Ma na rao diana aai gi na langi kasi faatai, boro afetai daka aagwa.

6

¹ Na tooa gi sui na da rao o'oni gera ka manata baita ana wane baita gera gi, hai ta iimola ka langi si bae ta'a ana hatana a God ma na faatolomailaa golu. ² Ma na wane rao gi naa na wane baita gera gi da manata mamana ana Christ, langi dasi mamagutainia fuada, sulia gera na waihaasi gera gi. Gera ka rao diana ka tasa fuada, sulia na tooa da manata mamana na gera

rakediana fuada na tara gera ka ngalia dianalana na raolada.

Na faatolomaia susuge ma na rikidooa mana.

Nia naa, oko faatolomai ma oko bae sulia si doo naa gi. ³ So ni tei na e faatolomainia na faatolomaia e'ete ma ka langi si aalafaafia na baelaa mamana a Lord gia a Jesus Christ ma na faatolomaia mamana sulia a God, ⁴ i nia e lafe ma ka langi si haitamana go tesi doo. Ma na kwaidooria nia e ta'a uria na oolisuusulaa sulia na baea gi. Ma si manata gi naa e haungainia na kwaifilaa ma na oolisuusulaa, ma na bae tatagalaa ma na manatalaa ta'a sulia na tooa gi, ⁵ ma na oolisuusulaa sulia dani faasia na tooa na manatada langi si rao ma ka langi dasi haitamana naa na mamanaa. Gera manata hasa na foomalaa nia na aadea wane ka ngalia malefo.

⁶ Haia, na lealaa sulia a God haitamana ka faatodadoo na wane lea so na kwaidoorilaa nia gi ka fono ana si taa gi na nia ka too ana.

⁷ Haia, na taa na golu ngalia mai la molaagali naa? Langi go! Ma na taa naa tara golu ngalia faasia na molaagali naa? Langi go! ⁸ Nia naa, lea gia too na ana fanga ma na maku gi, tama doo nae e diana naa fuaga naa. ⁹ Ma na tooa gi na da dooria na todadoolaa, da aadea doo ta'a sulia na iilitooa ana kwaidooria oro gi na kasi diana, ma ka falea na filaa fuada ma ka funua. ¹⁰ Sulia na rakedianalaa ana malefo nia na aadea tooa ilia na ta'alaa kwalukaela gi. Teni tooa gi da hasi uria na malefo ma daka lea tau na ada faasia na manata mamananalaa ana a God, ma na liobukonua oro gi ka naga na mourilada.

Na faatolomaia a Paul fuana a Timothy.

¹¹ Haia, i oe na wane nia a God, oko too faasia na doo naa gi. Ma oko hasi rigita amu uria na o'oloo, ma na toolaa aabu, ma na fiimamanalaa, ma na rakedianalaa, ma na tasa dongaalaa kada ana afetaia gi, ma na toolaa hahaore. ¹² Oko rao diana uria na manata mamanalaa. Haia, oko ngalia na mouria firi na a God e fili oe uria, si kada baa o bae rigita sulia na fiimamanalaa oe i fuana tooa oro gi. ¹³ Haia, i nau ku eeresi oe i naona a God na e falea na mouria fuana na doo gi sui ma i naona a Christ Jesus na wane baa e bae rigita sulia na fiimamanalaa nia i fuana a Pontias Paelat, ¹⁴ hai oko roosulia na doo nae gi ma oko aade sulia hai oko folaa ma langi osi garoa lea ka dao ana fe dani na Lord gia a Jesus Christ ka ooli mai ana. ¹⁵ I nia tara ka dao faatai ana si kada o'olo na a God e filia. A God naa e baita ka tasa usia na doo gi sui, ma na aaofia na e baita ana aaofia gi, ma na Lord usia na lord gi. ¹⁶ Ma tee taifili nia go na e mouri ita mai na hafalilaa ma ka mouri lau katau katau, ma i nia e too i laona na folaa na e langi ta wane kasi bobola naa fai nia na dao garangilana. Ma e langi ta wane kasi riki nia ua, ma e langi ta wane kasi bobola naa uria na rikilana. Na faabaitalaa ma na rigitaa na e totoo firi ka too fuana! Amen.

¹⁷ Oko haea fuana tooa gi na da too na ana na todadoo i laona na molaagali naa, langi dasi lafe. Ma da aalua ada fiitoolaa gera ana a God, ma langi lau na todadoo gera gi na e ali'ali ka sui. I gia haitamana fiitoo ada ana a God, na wane na e falea na doo gi sui fuaga uria na eelelaa

sulia. ¹⁸ Oko haea fuada gera ka iili diana eeri gera ka todadoo ana na raolaa diana gi, ma gera ka falea doo oro fuana tooa ma daka maabe uria na adolaa laugo ana fai nia teni tooa gi lau. ¹⁹ E urinae naa na tara gera ka taingainia ada na todadoo na e ngado uria si kada na e nia ua mai, eeri daka too ana na mouria na e mamana.

²⁰ Timothy ae, o aadasuli diana ana taa naa God e falea oko aadasulia. Ma langi osi rongo sulia baelaa ta'a gi ma na oolisuusuu ooewanea gi na teni tooa gi da hae garo ana daka alangi ana <<na haitamadooa>>. ²¹ Sulia teni tooa gi da haea hasa i gera naa na da too ana na doo naa, ma daka lea garo faasia na fiiamanalaa ana a Christ.

Nau ku fooma eeri na dianalaa nia a God ka too fai gamu sui.

Lau New Testament

Lau: Lau New Testament (New Testament)

copyright © 1992 Wycliffe Bible Translators, Inc.

Language: (Lau)

Contributor: Wycliffe Bible Translators, Inc.

All rights reserved.

2020-11-23

PDF generated using Haiola and XeLaTeX on 21 Feb 2024 from source files dated 29 Jan 2022

04ff0905-6192-57c6-8d94-302e2c78a1da